

通志堂集

通志堂集卷四

納蘭

性德

容若

原名成德

五言律詩

扈從

聖駕祀東岳禮成恭紀

岱宗柴望處仙蹕迴雲霄禮樂猶三代諸侯協肆
朝東封金牒字南指玉衡杓闕里應相近回鑾亦

不遙

時傳 肯南巡回
日祀曲阜聖廟

塞外示同行者

西風千萬騎颯沓向陰山爲問傳書鴈孤飛幾日

還負霜憐戍卒乘月望鄉關王事兼程促休嗟客
鬢斑

金陵

勝絕江南望依然圖畫中六朝幾興廢滅沒但歸
鴻王氣條云盡霸圖誰復雄尚疑鍾隱在回首月
明空

寄梁汾并葺茅屋以招之

三年此離別作客滯何方隨意一尊酒殷勤看夕
陽世誰容皎潔天特任踈狂聚首羨麋鹿爲君構

艸堂

題蘇文忠黃州寒食詩卷

古今誠落落何意得斯人
紫禁稱才子黃州憶逐
臣風流如可接翰墨不無神
展卷逢寒食標題想
後塵

郊園即事

勝侶招頻嬾幽尋度石梁
地應鄰射圃花不礙毬
場解帶晴絲弱披襟露葉涼
此間蕭散絕隨意倒
壺觴

沈進士爾燝歸吳興詩以送之

成名方得意幾日問歸舟獨有離居者蕭然感素

秋一筇黃葉寺孤棹白蘋洲無限江湖興因君寄

虎頭

時梁汾客茗上

歲晚感舊

時序忽云暮離居倍悄然誰將仙掌露換却日高
眠短夢分今古長愁減歲年平生無限淚一洒燭
花前

送張見陽令江華

楚國連烽火深知作吏難
吾憐張仲蔚臨別勸加餐
避俗詩能寄趨時術恐殫
好名無不可聊欲砥狂瀾

雄縣觀魚

漁師臨廣澤侍從俯清瀾
瑞入王舟好仁知聖網寬
撥鱗飛白雪行鱠縷金盤
在藻同周讌時容萬姓看

駕幸五臺恭紀

杳杳丹梯上迢迢翠輦迴
慈雲籠戶牖佛日現

樓臺珠樹叅天合金蓮布地開

金蓮花惟山中有此種

共傳

天

子孝親侍

兩宮來

入直西苑

望裏蓬瀛近行來閨苑齊晴霞開碧沼落月隱金
隄葉密鶯先覺花繁徑不迷笙歌廻輦處長在
鳳城西

景山

雪裏瑤華島雲端白玉京削成千仞勢高出九重
城繡陌廻環繞紅樓宛轉迎近天多雨露草木每

先榮

蕉園

見說齋壇闕前朝大乙祠鶯邊花樹樹燕外柳絲
絲宮籞人稀到詞臣例許窺今朝陪豹尾新長萬
年枝

松花江

宛宛經城下泱泱接海東烟光浮鴨綠日氣射鱗
紅勝擅佳名外傳訛舊志中

即混同江也金史有宋瓦江舊志遂以混同松花爲二江誤矣

花時春漲暖吾欲問漁翁

盛京

拔地蛟龍宅當關虎豹城山連長白秀江入混同
清 廟社靈風肅豪強右族更明明開創業休擬
作陪京

與經生夜話

率意元無咎經心始自疑昔人猶有恨今我竟何
期客與齊書帙人來問画師若無心賞在愁絕更
從誰

詠籠鶯

何處金衣客
栖栖翠幙中
有心驚曉夢
無計轉春風
漫逐梁間燕
誰巢井上桐
空將雲路翼
緘恨在雕籠

夜合花

階前雙夜合
枝葉敷華榮
疎密共晴雨
卷舒因晦明
影隨筠箔亂
香雜水沉生
對此能消忿
旋移近小楹

丁香

芳譜稱佳客
仙株也姓丁
鶴翎風細細
雞舌氣冥冥

冥紫勝心中結銀璫耳上星深閨多韻事名愛借
餘馨

桂

叢樹淮南茂秋林嶠外芳碧珊天女珮金縷月娥
簫露鑄鸞釵色風薰鴛鴦嶺香釀花新醅熟味美勝
椒漿

荷

魚戲葉田田鳬飛唱采蓮白裁肪玉瓣紅翦綵霞
箋出浴亭亭媚凌波步步妍美人憐並蒂常繡枕

函邊

又

華藏分千界憑闌每獨看不離明月鑑常在水晶
盤卷霧舒紅幕停風靜綠紈應知香海窄只似液
池寬

魚子蘭

石家金谷裏三斛買名姬綠比琅玕嫩圓應木難
移若蘭芳竟體當暑粟生肌身向樓前墮遺香淚
滿枝

茉莉

南國素嬋娟春深別瘴烟鏤冰含麝氣刻玉散龍
涎最是黃昏後偏宜綠髮邊上林聲價重不憶舊
花田

七言律詩

擬冬日景忠山應制

岧峣鐵鳳鎖琳宮親侍鑾輿度碧空 聖主豈因
崇象教宸遊直自接鴻濛遠山雪有一峰白別浦
楓餘幾樹紅天意不教常肅殺佇看宇宙徧春風

湯泉應制四首

清時禮樂萃朝端次第郊原引
玉鑾河岳千年歸帶礪寢園三月拜衣冠
便從畿甸親民隱更啓神泉示從官
非獨炎靈鍾坎德恩波深處不知寒

又

六龍初駐浴蘭天碧瓦朱旗共一川
潤逼仙桃紅自舞醉酣人柳綠猶眠
吹成暖律回燕谷散作薰風入舜絃
最是垂衣深聖德不須詞筆頌甘泉

又

魚鱗鴈齒鏡中開
濺沫爲霖遍九垓
不用劫灰求彷彿
便從天漢象昭回
桑壇法駕乘春轉
鶴禁仙鑣問寢來
遙祝海隅同帝澤
年年長聽屬車雷

又

身向咸池傍末光
三危露暖不成霜
金鋪照日初涵影
玉甃生烟別作香
地接蓬萊通御氣
波翻豆蔻散朝涼
微臣幸屬賡歌日
願借如川獻壽觴

秋日送徐健菴座主歸江南四首

江楓千里送浮颺
玉佩朝天此暫辭
黃菊承杯頻

自覆青林繫馬試教騎朝端事業留他日天下文
章重往時聞道 至尊還側席栢梁高宴待題詩

又

玉殿西頭落暗颼迴波寧作望恩辭蛾眉自是從
相妬駿骨由來豈任騎白首盡爲酬遇日青山真
奈送歸時嚴裝欲發頻相顧四始重拈教詠詩

又

不同紈扇怨涼颼咫尺重華好薦辭衡嶽鴈排迴
日字葛陂龍待化來騎斑斕正好稱觴暇絲竹誰

從著屐時弱植敢忘春雨潤一生長誦角弓詩

又

惆悵離筵拂面颼幾人鸞禁有宏辭魚因尺素殷
勤剖馬爲郵泥鄭重騎定省暫應紆遠望行藏端
不負清時春風好待鳴騶入不用淒涼錄別詩

即日又賦

商飈獵獵帝城西極目平沙草色齊一夜霜清林
葉下五原秋迴塞鴻低相將綠酒浮萸菊莫向黃
雲聽鼓鼙此日登高兼送遠欲歸還聽玉驄嘶

再送施尊師歸穹窿

紫府追隨結願深
曰歸行色乍駸駸
秋風落葉吹飛鳥
夜月橫江照鼓琴
歷刼飛沈寧有意
孤雲去住亦何心
貞元朝士誰相待
桃觀重來試一尋

題竹爐新詠卷

并序

惠山聽松菴竹茶爐歲久損壞甲子
秋梁汾倣舊製復爲之置積書巖中
諸名士作詩以紀其事是冬余適得
一卷題曰竹爐新詠則明時王舍人

孟端李相國西涯詩画並在實聽松
故物也喜以歸梁汾即名其巖居曰

新詠堂因次原韻

爐成卷得事天然乞與幽居置坐邊
恰映芙蓉亭下月重披斑竹嶺頭烟
画如董巨真高士詩在成弘極盛年
相約過君同展看淡交終始似山泉

賦得月下聽泉得陽字

陰森松檜敞虛堂月白泉清入戶涼
半嶺清暉涵水木斷崖風雨濺衣裳
濛濛碧艸侵堦合噉噉驚

鳥出岫長興熟祇應來往慣明朝攜酒待斜陽

通志堂成

茂先也住渾河北車載圖書事最佳薄有縹緗漆
鄴架更依衡泌建蕭齋何時散帙容閒坐假日消
憂未放懷有客但能來問字清尊寧惜酒如淮

病中過錫山

潤州山盡路漫漫天入蓉湖漾碧瀾彩鷁風檣連
塢影飛鴻雲陣度峰巒泉烹綠茗徐蠲渴酒汎青
瓷漸却寒久愛虎頭三絕譽今來仍向画中看

又

櫂女紅妝映茜衣
吳歌清切傍斜暉
林花刺眼蓬窓入
藥裏關心蠟屐違
藕蕩波光思澹永
碧山嵐氣望霏微
細莎斜竹吟還倦
繡嶺停雲有夢依

春柳

苑外銀塘乍泮冰
柳眠初起髣髯鬢
謝娘微黛輕難學
楚女纖腰弱不勝
裊霧縈烟枝濯濯
欹風困雨浪層層
絮飛時節青春晚
綠鎖長門半夜燈

垂絲海棠

天孫翦綺繫纈絲似睡微醒困不支曉露冷勻新
茜靨春烟晴暈淡顰脂櫻桃對面羞酣態棠棣相
窺妬艷姿惟有粉垣斜日色愛扶紅影弄參差

杏花

不是心傷艷藥梢依稀扶醉過花朝枕函宿粉勻
無跡病頰微紅淡欲消羯鼓催開春艷艷早鶯啼
破雨飄飄竹籬村店年時會想得當壚爾許嬌

又

馬上牆頭往往迎一枝低亞帽簷橫画橋壓浦知

詞六首集卷四
何處紅袖招人綽有情深巷月斜留蝶宿小池烟
曉拂奩輕鞦韆索下春纔半暗數流光到賣餠

又

吹罷江梅纔幾日一枝閒淡又斜暉寒禁花信愆
期易病減春游好事稀池面留脂嬌獨絕樓頭聽
雨夢相違社錢掠得茅菴去也勝前村買醉歸

又

婷婷誰伴度春宵點染疎枝淺色嬌丁字簾前香
夢斷粉光亭外薄寒消移來片月如梅影從此東

風到柳條花似去年人憶別賣花消息絕無慘

又

一段柔情百媚生
妬他流水去無聲
凝粧似解登垣望
薄怒何當破笑迎
繡戶紅雲烘壁帶
画梁殘照泊檐旌
曲江好在花千樹
憔悴誰知浪得生

上巳清明

悵望天涯今節同
酒懷詩思兩匆匆
流杯亭榭鳴鳩雨
近水人家插柳風
芳艸何心長自綠
桃花無賴只能紅
踏青袂襖相將去
牢記歸途此日逢

綠陰

春雨春風洗故枝
殘紅落盡碧參差
烟光薄處蜂猶覓
日影添來馬不知
匝地重陰迷別徑
捲簾濃翠潤枯基
亂蟬轉眼柴門路
又見先生坦腹時

雨後

宿雨蘆村暑乍清
歸雲天外一峰晴
蟬嘶柳陌多相應
燕踏琴絃別作聲
白日旋消高枕過
秋風又向亂砧生
傷心咫尺江千路
擬著漁簑計未成

秋夜

庾亮南樓發興同稍聞疎響起梧桐蘋風涼暈初
絃月草露秋歸滿院蟲燈火有情添夜課文章無
效悔前功相思此際江邊客夾岸蒹葭聽不窮

中元前一夕枕上偶成

酒醒池亭耿不眠帳紋漠漠隔輕烟溪風到竹初
疑雨秋月如弓漸滿絃殘夢達經吹角戍明河長
亘擣衣天袞蛩饒曉渾多事也似嚴更古驛邊

南海子

相風微動九門開南陌離宮萬柳栽草色橫粘下

馬泊水光平占瞭鷹臺錦韉欲射波間去玉輦疑
從島上回自是軟紅驚十丈天教到此洗塵埃

淨業寺

紅樓高聳碧池深荷芰生涼豁遠襟湖色靜涵孤
刹影花香暗入定僧心經翻佛藏研朱筴地賜朝
家布紫金下馬長堤一吟望梵鐘雜送海潮音

扈 蹕霸州

霸山重鎮奠神京 鸞輅春游淑景明萬派銀濤
衝古岸四圍玉甃護嚴城花承暖日迎來騎柳帶

新膏綰去旌八砮雄圖今更固行隨賞樂勝蓬瀛
幸舉禮闈以病未與廷試

曉榻茶烟攬髻絲萬春園裏誤春期誰知江上題
名日虛擬蘭成射策時紫陌無游非隔面玉堦有
夢鎮愁眉漳濱強對新紅杏一夜東風感舊知

喜吳漢槎歸自關外次座主徐先生韻
才人今喜入榆關回首秋笳冰雪間玄菟漫聞多
白雁黃塵空自老朱顏星沉渤海無人見楓落吳
江有夢還不信歸來真半百虎頭每語淚潺湲

山海關

雄關阻塞戴靈鼇控制盧龍勝百牢山界萬重橫
翠黛海當三面湧銀濤哀笳帶月傳聲切早雁迎
秋度影高舊是六師開險處待陪巡幸扈星旄

興京陪祭福陵

龍盤鳳翥氣佳哉東指齋宮御輦來影入松楸
僊仗逵香升俎豆曉雲開盛儀備處千官肅神貺
承時萬馬回豹尾叨陪須獻頌小臣慚愧展微才

泰山

靈符作鎮敞天門羣嶽稱宗秩望尊三觀峰高擎
日月五株松偃老乾坤雕甍貝闕神宮壯碧蘚蒼
厓古碣存遠眺齊州烟九點不知身在白雲根

曲阜

萬騎新過五父衢玉鑾停御壁池初絃歌疑尚聞
興闕荆棘還看自翦除秘笈琳瑯懷裏玉寶光騰
躍壁中書小臣久已瞻麟角何幸趨承俎豆餘

扈駕西山

鳳翥龍蟠勢作環浮青不斷太行山九重殿閣

葱龍裏一氣風雲吐納閒
熊虎自當馳道伏蛟螭
長捧御書閒黃圖
此日論形勝慚媿頻叨侍
從班

古北口

亂山如戟擁孤城
一線人爭鳥道行
地險東西分障塞
雲開南北望神京
新圖已入三關志
往事休論十路兵
都護近來長不調
年年烽火報昇平

五言排律

扈駕馬蘭峪賜觀溫泉恭紀十韻

御天來鳳輦浴日啓龍池野迴紆 皇覽春濃值
聖時落花縈綵仗初柳拂朱旗行漏三辰擁停
鑾萬象隨瑞徵泉是醴喜溢沼生芝特許觀靈液
相將陟禁墀氣凝漿五色味結露三危 仙蹕程
遙度 慈闈駕近移倍隆長樂養兼採廣微詩
從誠多幸重華賞薦辭

和唐李昌谷惱公詩原韻

洞戶層層碧雕闌處處紅屏山開孔雀綺石綴芳
叢麝靨安黃小蛾眉點黛濃纖腰欺柳帶慧思展

蕉筒粉盒調湘芷瓷餅插水萍宿枝尋曉蝶書葉
愛春蟲被浪翻靈粟惟雲颺紫茸晝眠妝復整晚
浴汗初融羅襪宜乘霧仙裾可趁風寄詩寧芍藥
擘紙研芙蓉硯拂琉璃匣香熏翡翠籠媚花簪蔓
鶴心果剥荷蜂乍見波先注佯羞意若蒙投梭嗤
北里抱布炫南賓華燭然青鳳文茵藉綠熊柔攜
蕙樣手笑映月如弓詎信爲行雨還疑化彩虹夢
中遊洛浦意外到崆峒只合巫山住何須石笋封
但期常比翼卽似驟乘龍續續更催箭丁丁漏盡

銅誓要長久約密訂往來蹤漢渚明星隱咸池旭
日烘霞光生綺縠樹色辨青葱喜氣膠投漆離情
淚染楓王昌聯井舍宋玉隔牆墉露浥桃初綻風
披李正穠異香專寄壽射鳥莫過馮鸞影昏秦鏡
鵲絃解蜀桐白頭吟早就黃耳信無從苔滿斜紋
砌塵凝刻瑣櫳暗添瑤瑟怨漸減雪肌豐郎性翩
秋蒂儂操勵晚菰選歌嗔傳婢買卜倩騶僮水面
窺金鯉樓頭望玉驄自憐江柳態誰憶海棠容盡
日懷將仲無時見子充贈遺傳陌上期送說桑中

四葉裁新袖三花翦細髮笑言知宴宴棄置嘆
叩鸚鵡聲猶喚鴛鴦夢少通夜將愁共永春與意
俱融寫恨盈千疊思君不再逢挑燈增懊惱依枕
即惺忪鏡聽何曾吉瓢占併是凶淒涼憐永夜寂
寞類深宮獨寤悲青女燒香問碧翁合歡虛舊繡
連理悔重縫薄命嗟秋扇傷心泣曙鐘代題閨裏
怨未覺錦囊空

玉泉十二韻

地湧西山脉名標
禁籞泉百層飛作雨萬頃滙

成淵潤下終歸海源高却自天縈烟來樹杪帶雪
落雲邊隱見瑤光曳琤璫珮響傳紅欄橋宛轉烏
榜擢洄沿星漢隨灣瀉樓臺倒影鮮蛟龍蟠翠島
雁驚起瓊田鏡面晶熒合珠痕蕩漾圓翠流初放
荇嬌擁半開蓮 睿賞懸孤鑒餘波溢九璇那居
真有慶魚藻在詩篇

通志堂集卷四

通志堂集卷五

納蘭

性德

容若

原名
成德

五言絕句

雪中和友

哀鴈兼鄰杵共君寒夜心
窓前吹宿火朔雪滿空林

又

竹塢寂無人雪深山路澀
澗底響層冰居人自朝汲

又

白屋無人事況逢春雪餘
山中問梅蕊頻寄一行書

秋意

苑雲銜日去踈雨欲來時
忽見小庭中草花三兩枝

又

涼風昨夜至枕簟已瑟瑟
小女笑吹燈床頭捉蟋蟀

又

雨聲池館秋漠漠橫塘水水鳥故窺人飛入荷花裏

題趙松雪水村圖

北苑古神品斯圖得其秀爲問鷗波亭烟水無恙否

題胡瓌射鴈圖

人馬一時靜祇聽哀鴈音塞垣無事日聊欲耗雄心

七言絕句

西苑雜詠和蓀友韻

宮花半落雨初停
早是新炎撤画屏
何必醴泉堪避暑
藕絲風好水西亭

又

離宮近繞綠蘋洲
冰簟銀床到處幽
好是萬幾清暇日
親持玉勒奉宸遊

又

太液東頭散直遲
一雙水鳥掠楊枝
從臣獻罷平

江上去回看北斗是天南

又

玲瓏朱閣擬三山上駟門依御柳間倦聽月中歌
吹杳晨鳧秣罷夜分還

又

制勝由來仗德威夜郎何物敢輕違河清欲頌慚
才盡空羨儒臣賜宴歸

又

講帷遲日記花輶下直歸來一惘然有夢不離香

案側侍臣那得日高眠

又

不須惆悵憶江湖身入金門待漏圖中使擎來仙
掌露萼羹風味得如無

又

花暎初陽覆綺寮玉珂雙引望中遙憑君莫作烟
波夢曾是烟波夢早朝

詠史

千秋名分絕君臣司馬編年繼獲麟莫倚區區周

鼎在已教俱酒作家人

又

一死難酬國士知
漆身吞炭祇增悲
英雄定有全身策
狙擊君看博浪椎

又

章武誰脩季漢書
建興名號亦模糊
笑他典午標凡例
不遣青龍混赤烏

又

諸葛垂名各古今
三分鼎足勢浸淫
蜀龍吳虎真

無愧誰解公休事魏心

又

漢江高接蜀江流霖雨漂沈版築休可惜不教樊
口下襄陽仍屬魏荊州

又

痛哭難爲入廟身譙周本意勸稱臣市橋旂幟咸
陽戰不及成家尚有人

又

捲甲空迴丁奉軍陵江官號已更新若將唇齒論

吳蜀可有宮門拜表人

又

勞苦西南事可哀也知劉禪本庸才
永安遺命分明在誰禁先生自取來

又

名士何曾忘義熙故將山水託遊嬉
韓亡秦帝渾閒事誰續臨川內史詩

又

寶鞘金貂別有才踴圍鳴鼓日千回
老兵不少俞

靈韻親向營門逐馬來

又

零落金蓮帖地灰
練兒顧盼自雄才
三千宮女同時出
也愛潘妃國色來

又

注籍紛紛定價餘
市曹行鴈待銓除
後來又變停年格
請命誰收薛琰書

又

上使空持白虎幡
誰教博議採袁翻
高車勁敵婆

羅在特與涼州作外藩

又

金龍玉鳳埒高陽富貴從誇章武王王謝風流君
不見世家原自重文章

又

朝政神龜已可知羽林旁午辱張彝洛陽大有平
城使正是傾貲結客時

又

中允功名洗馬才舊僚陪送有誰哀臨湖殿裏鸞

弓客却向宜秋洒涕廻

又

羽衣木鶴想前身不到升仙到奉宸自是平章曾
入奏在廷何限賦詩人

又

軍職新加呂用之神仙樓殿極參差那知論謫渾
無賴曾傍江陽后土祠

又

博學今無沈晦倫宣和名論一時新衆中大有搖

頭客莫便輕欺下坐人

又

都監聲名敵指揮
隔河降表最先馳
赤崗事與滹沱異
勿問中朝沒字碑

上元即事

翠眊銀鞍南陌回
鳳城簫鼓殷如雷
分明太乙峰頭過
一片金蓮火裏開

詠柳偕梁汾賦

烟水頻年瘦不支
相看餘得許多絲
靈和舊事今

如夢却到人間管別離

又

弱絮殘鶯一半休萬條千縷不勝愁祇應天上張
星伴莫向青門繫紫騮

秣陵懷古

山色江聲共寂寥十三陵樹晚蕭蕭中原事業如
江左芳草何須怨六朝

題虞美人蝴蝶画扇

寫得春風分外嬌粉痕零落暈紅潮曲終夢醒渾

無那同向斜陽恨寂寥

有感

帳中人去影澄澄重對年時芳苾燈惆悵月斜香
騎散人間何處覓韓馮

四時無題詩

一樹紅梅傍鏡臺含英次第曉風催深將錦幄重
重護爲怕花殘却怕開

又

金鴨香輕護綺櫺春衫一色颺蜻蜓偶因失眠嬌

無力斜倚熏籠看画屏

又

手撚紅絲凭繡床曲闌亭午柳花香十三時節春
偏好不似而今惹恨長

又

青杏園林試越羅映妝殘月曉風和春山自愛天
然妙虛費筠奩十斛螺

又

綠槐陰轉小闌干八尺龍鬚玉簟寒自把紅牕開

一扇放他明月枕邊看

又

水榭同攜喚莫愁一天涼雨晚來收
戲將蓮葯拋池裏種出花枝是並頭

又

小睡醒來近夕陽鉛華洗盡淡梳粧
紗幮此日偏惆悵翦取巫雲做晚涼

又

追涼池上晚偏宜菱角雞頭散綠漪
偏是玉人憐

雪藕爲他心裏一絲絲

又

却對菱花淚暗流誰將風月印綢繆生來悔識相思字判與齊紈共早秋

又

解盡餘醒熱盡香雨聲蟲語兩淒涼如何剛報新秋節便覺清宵分外長

又

璇璣好譜斷腸圖却爲思君碧作朱幾夜西風消

瘦盡問儂還似舊時無

又

菊香細細撲重簾日壓雕簷起未忺端的爲花憔悴損一枝還向膽瓶添

又

凝陰容易近黃昏獸錦還餘昨夜溫最是惱人風弄雪睡醒無事總關門

又

玉指吳鹽待剖橙忽聽樓外馬蹄聲問郎今天

寒甚却是何人抵暮行

又

漫學吹笙苦未調
嬌癡且自閱
桄榔博山香盡殘
灰冷零落霜華帶月飄

又

謾熱甜香謾煮茶
桃符換却已聞鴉
宿粧總待侵晨換
留取鬢心栢子花

記征人語

列幙平沙夜寂寥
楚雲燕月兩迢迢
征人自是無

歸夢却枕兜鍪卧聽潮

又

橫江烽火未曾收
何處危檣繫客舟
一片潮聲飛石燕
斜風細雨岳陽樓

又

樓船昨過洞庭湖
蘆荻蕭蕭宿鴈呼
一夜寒砧霜外急
書來知有寄衣無

又

旌旗歷歷射波明
洲渚宵來畫角聲
啼遍鷓鴣春

艸綠一時南北望鄉情

又

青燐點點欲黃昏折鐵難消戰血痕
犀甲玉袍看繡澀九歌原自近招魂

又

戰壘臨江少落花空城白日盡飢鴉
最憐陌上青青草一種春風直到家

又

陣雲黯黯接江雲江上都無鴈鷺羣
正是不堪回

首夜誰吹玉笛弔湘君

又

邊月無端照別離故園何處寄相思西風不解征
人苦一夕蕭蕭滿大旗

又

移軍日夜近南天薊北雲山益渺然不是啼烏銜
紙過那知寒食又今年

又

髣髴蕭蕭夜枕戈隔江清淚斷猿多霜寒画角吹

無力歸夢秦川奈爾何

又

一曲金笳客淚垂
鐵衣閒却卧斜暉
衡陽十月南來鴈
不待征人盡北歸

又

纔歇征輦夜泊荻花楓葉共颼颼
醉中不解雙韃卧
夢過紅橋訪舊遊

又

去年親串此從軍
揮手城南日未曛
我亦無端雙

袖濕西風原上看離羣

上元月食

夾道香塵擁狹斜金波無影暗千家
姮娥應是羞分鏡故倩輕雲掩素華

東西溟

廿載踈狂世未容重來依舊寺門鐘
曉衾何處還家夢惟有涼颼起古松

偕梁汾過西郊別墅

遲日三眠伴夕陽一灣流水夢魂涼
製成天海風

濤曲彈向東風總斷腸

爲友人賦

不將才思唱臨春
愛着荷衣狎隱淪
分付芙蓉湖上月
好留清影待歸人

又

夢裏誰曾與画眉
別來幾度燕相窺
小樓日暮愁無那
折取藤花寄所思

又

往事驚心玉鏡臺
分香庭院長莓苔
百花深護桃

源犬不許潛吟起夜來

又

長安北望杳茫茫
泣向薰籠憶舊香
惆悵玉環空
寄與紫薇郎是薄情郎

又

珍重嬌鶯啄柳芽
清狂曾賦壓牆花
皚皚自許人
如雪何必丁寧繫臂紗

又

朝衣欲脫換輕衫
無恙西風舊布帆
秋入玉潭新

月冷休因索莫怨崔咸

書鮑讓侯詩後

多少才情豔綺霞
羨君能賦上林花
如余硯北渾無事
只傍紅牕枕木瓜

賦得柳穀傳書圖次陳其年韻

黃陵祠廟白蘋洲
尺幅圖成萬古愁
一自牧羊涇水上
至今雲物不勝秋

又

花愁雨泣總無倫
憔悴紅顏画裏真
試看劈天金

鑠去雷霆原惱薄情人

又

晶簾碧砌玉玲瓏
酒滴珍珠日未中
忽報美人天上落
寶箏筵裏盡春風

又

凝碧宮寒覆羽觴
洞庭歌罷意茫茫
玉顏寂寞今依舊
雨鬢風鬟枉斷腸

別蓀友口占

離亭人去落花空
潦倒憐君類轉蓬
便是重來尋

舊處蕭蕭日暮白楊風

又

半生餘恨楚山孤
今夜送君君去吳
君去明年今夜月
清光猶照故人無

題照

画出東風別一般
綠窓人靜獨憑闌
就中真色圖難就
最是春山兩筆難

塞垣却寄

絕塞山高次第登
陰崖時見隔年冰
還將妙寫簪

花手却向雕鞍試臂鷹

又

千重烟水路茫茫不許征人不望鄉
況是月明無睡夜儘將前事細思量

又

碎蟲零葉共秋聲訴出龍沙萬里情
遙想碧牕紅燭畔玉纖時爲數歸程

又

枕函斜月不分明夢欲成時那得成一派西風連

角起寒雞已到第三聲

別意

晶簾低映美人蕉
雨歇芳叢點未消
應是玉鞭歸較晚
故從花底坐無聊

又

濃香如霧恍難尋
執燭櫻桃伴夜深
慚愧十郎歸未得
空題紅淚寄焦琴

又

獨擁餘香冷不勝
殘更數盡思騰騰
今宵便有隨

風夢知在紅樓第幾層

又

芭蕉陰暗玉繩斜
風送微涼透碧紗
記得夜深人未寢
枕邊狼藉一堆花

又

銀屏對影自生憐
正是看花中酒天
翦却合歡雙帶子
一般牽恨又今年

又

茗盃香爐事事幽
每當相對便無愁
金籠自結雙

栖願那得齊紈怨早秋

暮春見紅梅作簡梁汾

杏花庭院月如弓又見江梅一瓣紅知是東皇深
著意教他終始領春風

詠絮

落盡深紅綠葉稠旋看輕絮撲簾鉤憐他借得東
風力飛去爲萍入御溝

初夏月偕仲弟作

雲母窓扉夜不扃露華和月滿中庭可憐春去無

多日已怯微暄敞画屏

龍泉寺書經畧叔扇

雨歇香臺散晚霞
玉輪輕碾一泓沙
來春合向龍泉寺
方便風前檢較花

又

繡旛風定晝惛惛
證取蓮花不染心
佛法自來空色相
當年何事苦吞針

柳枝詞

一枝春色又藏鴉
白石清溪望不賒
自是多情便

多絮隨風直到謝娘家

又

春到江南春草生乍驚搖曳撲簾旌黃鸝無語昏
鴉起深閉重門待月明

又

七香車過殷輕雷十里紅樓照水開遙指玉鞭鞭
白馬柳陰陰下是郎來

又

水亭無事對斜陽宛地輕陰却過牆休折長條惹

輕絮春風何處不迴腸

又

何處纖腰不可憐
纏頭拋與沈郎錢
女兒睡覺推
牕看忽憶迎歡舊繫船

又

永豐坊裏謝啼鵲
移植紅泥曲檻邊
涼月一簾思
往事是他曾與伴無眠

又

人去樓空屬阿誰
月明惟見影垂垂
尋常已是堪

愁絕何況春來贈別離

又

何事憑闌怨月明
乍晴樓閣倍晶瑩
相思一夕溪流漲
倒影絲絲拂水平

又

綠到長干第幾橋
晚晴簾幙隔吹簫
前身自是輕狂甚
嫁得東風帶水飄

又

辛夷開罷絮紛紛
青粉牆頭日未曛
記得箇人春

病起是他縈惹綠羅裙

又

手綰長條倚水樓
困人風日懶梳頭
濛濛一抹催花雨
半繫斑駁半繫舟

又

軟風吹雪帶微香
曾向珠樓掃鈿床
塘上鴛鴦三十六
祇今何處月茫茫

又

風過遊絲卷落花
又隨飛絮上簷牙
東鄰爲約清

明後陌上輕衫共採茶

又

一水縈迴鴈齒橋紅泥亭搭綠絲絛潯陽縱有麻姑信春雨春風自寂寥

又

細細萍吹水面風百花飛盡綠陰同別離管盡人如昨羅袖長垂玉筍紅

又

休栽楊柳只栽桐待鳳藏鴉好盡空不見胥臺明

月夜一池黃葉但西風

上元竹枝詞

碧落簫聲轉玉壺踏燈隨處笑相呼相逢若箇能
相賞消得金霞照夜珠

又

舞散應憐化彩雲儘收紅紫付東君長安一片團
圓月只有秧歌徹曉聞

又

天上朱輪繡幃車幾看春色到梅花而今却畏春

寒甚獨掩重門自試茶

又

半落銀燈爆麝煤似聞穠李踏歌回上清更有新
翻曲不許瓊籤傍曉催

又柳枝詞

長條短葉漾東風寒食青郊處處同不待含烟兼
帶雨春山一半綠紗中

又

馬卿苦憶紅泥閣我亦傷心碧樹村病骨沈絛詞

客死更誰攀折與招魂

綠楊天半紅泥閣朱槿風前翠
袖人亡友馬孝廉雲翎柳枝詞

又

池上閒房碧樹圍簾文如縠上斜暉生憎飛絮吹
難定一出紅窓便不歸

又

翠袖寒輕立画橋江謳越吹激山椒看來都未關
情緒別向東風弄柳條

又

只恐隨風化彩雲夢回酒醒怨斜曛陌頭自領行

人意可奈閒來便見君

又

三春何處繫人情惟有垂楊傍戶明月到簾櫳遮
不斷雨來池館聽無聲

又

蕭條齊映白蘋洲宛轉青蛾恨未休梅雨過時憔悴
了年年無緒到清秋

又

密護軒窗障小樓從今不作少年遊一生幾許心

閒日不見相思見又愁

襍題

巖扉日日望城闌近水誰家背市塵
白板窗齊烏桤樹紅衫飄曳上樓人

又

碧嶂夫容不可攀閒聽客話釣臺間
惟應短棹迎潮去雷殷空江看雪山

又

亦有閒園臨水齋行來棊響漸丁丁
新陰四面無

窮竹一逕中通白石亭

又

碧城西去面山椒
細路緣堤未覺遙
日上麗譙看浴馬
千章高柳赤闌橋

從軍曲

細柳門開部曲閒
元戎親送六飛還
預陳辟穀他年志
許賜華陽十里山

又

錦衾千里惜餘香
獨宿天山五月涼
夢斷荒城天

欲曉李陵祠下月如霜

艷歌

紅燭迎人翠袖垂相逢長在二更時情深不向橫
陳盡見面消魂去後思

又

歡近三更短夢休一宵纔得半風流霜濃月落開
簾去暗觸玳玲碧玉鈎

又

細語回延似屬絲月明書院可相思牆頭無限新

開桂不爲兒家折一枝

又

洛神風格麗娟肌不見盧郎年少時無限深情爲
郎盡一身才易數篇詩

緱山曲

劉郎西閣阮郎東嬴女吹簫別故宮嫁盡仙姬春
寂寞獨留雞犬護花叢

又

人間曾見杜蘭香亂點明璫壓繡裳今日素衣翻

村画着個閒亭掛夕曛

玉泉

芙蓉殿俯御河寒殘月西風並馬看十里松杉清
絕處不知曉雪在西山

松花江

彌天塞草望逶迤萬里黃雲四蓋垂最是松花江
上月五更曾照斷腸時

平山堂

竹西歌吹憶揚州一上虛堂萬象收欲問六朝佳

麗地此間占絕廣陵秋

江南雜詩

紫蓋黃旗異昔年
烏衣朱雀總荒烟
誰憐建業風流地
燕子歸來二月天

又

九龍一帶晚連霞
十里湖堤半酒家
何處清涼堪沁骨
惠山泉試虎丘茶

又

鄧尉溪村萬樹梅
霜殘月白半春開
金臺游客時

相憶那得年年看一回

又

妙高雲級試孤攀一片長江去不還最是銷魂難
別處揚州風月潤州山

密雲

白檀山下水聲秋地踞潮河最上流日暮行人尋
堦館涼砧一片古檀州

南海子

分弓列戟四門開遊豫長陪萬乘來七十二橋

通志卷之三
天漢上彩虹飛下晾鷹臺

又

紅橋夾岸柳平分雉兔年年不掩羣飛放何須煩
海戶郊南新置羽林軍

通志堂集卷五